

## Larisa Cerić i Edin Džeko najbolji sportisti BiH u 2018. godini

Fudbaler Edin Džeko i džudistkinja Larisa Cerić najbolji su sportisti Bosne i Hercegovine za 2018. godinu. Ovo dvoje vrhunskih bh. sportista jednoglasno su izabrani za najbolje od strane stručnog žirija Izбора najboljeg sportiste BiH u organizaciji "Nezavisnih novina" i Radio-televizije BiH.

Žiri kojim je predsjedavao proslavljeni bh. košarkaš Mirza Teletović proglasio je najbolje u godini na izmaku. Džeko, koji je 2009. godine po prvi put osvojio nagradu za najboljeg sportistu BiH svojim briljantnim izvedbama na terenu u dresu bh. reprezentacije i rimske Rome stigao je zaslužen do druge nagrade.

"Svi znate da zbog obaveza u Rimu i oporavka od povrede, nisam večeras sa vama, ali to ne znači da ne pratim dodjelu nagrada u izboru BHRT-a i Nezavisnih. Ne samo večeras, već godinama unazad. Upravo zbog toga, nagrada koju sam dobio mi je itekako draga, a na svaku koja dolazi iz moje domovine, sam izrazito ponosan. Večeras ste podijelili veliki broj aplauza našim sportistima i hvala vam i u njihovo ime, ali i u moje. Međutim, našim sportistima i sportu u BiH treba malo drugačija podrška, osim tapšanja po leđima, aplauza i slikanja. Treba nam da vjerujete u nas i da nam pomognete da ostvarimo naše ciljeve i promoviramo Bosnu i Hercegovinu na sportskim borilištima. Bez pomoći države, bez vaše pomoći, kako finansijske, tako i svake druge vrste, to je jako teško i zato, volite i vi nas, onoliko koliko mi volimo Bosnu i Hercegovinu. Hvala vam na nagradi koju ste mi dodijelili, ponosan sam na nju i sretan što ste izabrali baš mene, među toliko sjajnih sportista i sportistkinja koje naša zemlja ima, a svi oni zajedno su mi motivacija za dalji rad. S obzirom na to da se bliže novogodišnji praznici, iskoristio bih ovu priliku da svim čestitam božićne i novogodišnje blagdane, te vas još jednom sviju pozdravljam i želim vam ugodnu večer, u nadi da nas sviju čeka bolja i ljepša budućnost. Hvala vam još jednom od srca", poručio je Džeko putem video poruke.

Među tri najbolja našli su se i karatista Ivan Klepić i atletičar Mesud Pezer.

Larisa Cerić, članica Džudo kluba Nippon iz Sarajeva i u ovoj godini je nastavila je kontinuitet vrhunskih dostignuća, što joj je donijelo već šestu titulu najbolje sportistkinja BiH.

"Sretna sam što sam po šesti put izabrana za najbolju sportistkinju BiH. Ovo je bila moja godina iz snova, osvojila sam srebro na EP, te bila treća na svijetu, a jedno vrijeme sam bila prva na svjetskoj rang listi", istakla je Cerićeva, koja je u najjužoj konkurenciji bila zajedno sa karatistkinjom Ivonom Čavar i košarkašicom Maricom Gajić.

Na gala večeri su tradicionalno dodijeljene nagrade u ukupno 12 kategorija. Epitet najbolje ekipe ponijela je Fudbalska reprezentacija BiH. Nagrada za najboljeg trenera zaslužen je otišla u ruke legendarnog Blaža Sliškovića, trenera HŠK Zrinjski. Za najperspektivniju sportistkinju i najperspektivnijeg sportistu proglašeni su najbolja mlada rukometašica BiH Jovana Ilić i supertalentovani teniser Draženu Petroviću.

Dodijeljena je nagrada i za razvoj sporta, a ovu laskava titula pripala je Atletskom klubu Glasinac. Stručni žiri je nagradu za fer-plej dodijelio motociklističkom trojcu, Anti Braovcu, Darku Radiću i Zijadu Huseinbegoviću.

Nagrade za životno djelo dodijeljene su Miloradu Karaliću, legendarnom rukometašu, olimpijskom šampionu iz 1972. sa reprezentacijom Jugoslavije i klupskom prvaku Evrope iz 1976. sa banjalučkim Borcem i Seadu Hadžijahiću, doajenu bh. novinarstva. Dodijeljene su dvije posthumne nagrade i to košarkaškom velikanu Sabitu Hadžiću nekadašnjem prvaku Evrope sa sarajevskom Bosnom, te Suadu Čupini, čije ime će vječno ostati protakano u karate sportu u BiH. (SCsport)

Date: 17-12-2018